

Boccalini

Ausschnitte aus dem Programm 2009

Miar Boccalini wünschand eu an guata Oba.
Stönd bitte uf, miar möchtand mit eu öppis proba.
Wenn iahr stönd, denn heband eu an da Händ ganz fescht,
nai fünd jetzt nid a gumpä, sisch nid Khurer-Oktobrefescht.

Jetzt stelland sie sich amol vor – miar tüand nur spassa,
d’Frau Calmy-Rey schafft in dr Migros an dr Kassa.
Sie hett as Kopftuach a, jo sie, jetzt kunnt ds Perfyda.
Do würdand sie doch sicher au dä Migros mida.

Amerika het Wahla, das isch eimol meh an Bschiiss.
D’Frog isch nit – wer isch guat, s’goht nur um schwarz oder wyss.
Im Nochberland vu üs regiirt dr Sarkozy,
bi ihm do muass as eifach nur a Bruni sy.

Jo Sie, miar sind drei Banker und verdianand guate Stutz.
D’Wirtschaftskrise isch für üs a ganz a lisa Furz.
Uf eimol schüttlats üsra Kurer und das isch nid ohni,
verlora sind für ihn und üs dia fetta Boni
My boni sind over the ocean, my boni is over the sea,
My boni sind under the ocean, o bring back my boni verbii...

Dr Papscht vu Rom dä suacht an Gascht fürs Radio-Vatikan.
Dr smarti Novartis-Vasella vu Basel – jo das wär dr Wahn.
Doch den ladt fr Razzi na us – will d’Novartis Verhüetigsmittel tuat vertriiba,
S’wär gschider gsi – ma heti dia vor 83 Jöhrli – sinar Muattar scho verschriiba.

Bim TSO könnnd alli Mitarbeiter wieder lacha.
Sie törfand jetzt für Wy und Biar Reklama macha.
Das isch an Strategieentscheid wo nötig isch,
dä Sender haltsch nur us, wenn’d würklich bsoffa bisch.

Dr Sämi Schmid dankt ab, dr Gegner rüeft juhee,
jetzt muass a neue anna und zwor eina vu dr SVP.
Blocher Murer heisst z’Ticket für d’Class-Politika,
wills eigentlich keina wend, wählands nur z’Generika.

A Ma im midlife-Chrysler-4 Rad-Atriebskarra.
Isch offroad wia sich’s ghört – zur nöchschta Garage gfahra.
Er well jetzt für da Klimaschutz sich engagiere,
und no’n a zwaiti Klima-Alag instaliara.

Vor dreina Täg, jo sie, das isch verschissa,
het mi im Fürschawald a so’na Köter bissa.
Drum gohn i jetzt uf d’Heid, döt
werdand di Viecher an d’Leina gnoh. Wer gsehn i am Heidsee spaziara, dr Luca Tenchio.

Schtümpa paffa, Zigi raucha, isch bald überall verbota.
Jo Sie, dia rauchendi Bevölkerig, dia will ma jetzt usrotta.
Miar sägand eu: das führt so wit, au du kusch eines Tages dra,
dass du zum Höpperla a Bewilligung muasch ha.

Sit null Punkt fuf Promille stönd d'Tschugger an allna Egga,
au mi hends gstoppt und i han gmerkt: Dia Siacha wenn'd mi legga.
Drum frog i fründlich: "Wem vu eu 4 - dörf i min Uswiis zeiga?"
Do seit a Stimm: "Usstiga, blosa, miar sind numma z'zweita."